

# Paul di ouresi bura

## Thessalonica vene rofu

### Ago di ini adina

Thessalonica bi Rome di taoni tora Macedonia gaganiri. Paul yaku minari ekalesia vene moi egogo reyo. Mina reyo ri, Paul yaku ago buni Jew de vene rofu niyo dada. Doba de Jew vene yaku ni tourage reyadi, amiye tau gade ini uka moigamo Judah ekalesia vegu dada. Paul bi mina resi Thessalonica feresi Berea ri boyo. Corinth okisi ameyo doba niyo ma usi, Paul bura yokoi baku reyo ini asini ma vakoi moimai redo amiye Timothy iniye di sina Thessalonica duburi mina iniye gokai vedo kana.

*Paul di ouresi bura Thessalonica vene rofu* bi mironari mina ekalesia vene rofu moi egira ma rama vo nigika bura reyo. Ina yaku Sei rofu buni tora gade maro, adina ini uka vari gira mana ma uka mana di ago neideyo. Ina vene sa doba de ameyo ri, ini beika vegu regasa amegamadi, mina vene rofu ni rua resi duburi Keriso dairi dego ni kaitena sina ni kabai resi niyo: kaere Keriso rofu mokena vari gira aisi muyeyo Keriso dairi denari bi toga ameibobina vegu moigo ba? Ma goivaka Keriso bi dubusa dairi dego? Paul bi mina resi ina vene niyo kumo moimai regasa Keriso dego nari regedi.

### Beika sina ideri

Ago di ini adina *1.1*

Buni tora gade nina ma roka moi odoro rena *1.2–3.13*

Ekalesia di vegu egira rena ago *4.1–12*

Keriso dairi dego di sina ago *4.13–5.11*

Metona vegu egira rena ago *5.12–22*

Metona ago *5.23–28*

---

**1** <sup>1</sup> Mina bura na Paul, Silas ma Timothy yaku —<sup>a</sup>  
Thessalonica ekalesia vene ya rofu, kaere bi Baba Sei ma Varika Iesu Keriso ideri:

Buni tora gade ma uka amuta bi yi.

---

<sup>a</sup> 1.1 Acts 17.1

### Thessalonica vene di vegu ma uka vari gira mana

<sup>2</sup>Una bi ari neinei ya vene tau rofuu usa usa nigasa ya vene fafau Sei rofuu buni tora gade masifa. <sup>3</sup>Una bi uni Baba Sei di nemokori toga ya mokei baisifa, gokai yi mokena vari gira aina moimai yaku moi vata rido, ma gokai yi uka mana yaku yi moimai rei tavoi moi vata rido, ma gokai yi uka mokena uni Varika Amiye Iesu Keriso rofuu mina moi gira rido. <sup>4</sup>Usika ourena, una diba Sei yaku ini uka ya mado ma ina yaku ya vo niyo ya bi ini, <sup>5</sup>adina uni ago buni bi ya rofuu dudu maka de moi baiyafa, idu vava nufa ka, ma Vima Kikifa sa ma mokena gira iniye sa. Makai ya ya diba gokai ya sa amegamafa ri vegu reyafa; ya rofuu reyafa dada. <sup>6</sup>Ya vene bi una ma Varika Amiye yaku amesifa kana mina reyadi; gokai esika esika tora gade moyadi, idu Vima Kikifa yaku ada ya vene maro ma ya yaku ago buni moi gira reyadi.<sup>b</sup> <sup>7</sup>Mina ye, ya bi Macedonia ma Achaia gagani di uka vari gira aidedi vene tau yaku veyagantedi kana niyadi. <sup>8</sup>Adina Varika Amiye di ago bi ya rofuu Macedonia ma Achaia ri maka de yakuyo, yi mokena vari gira aina Sei rofuu di sina bi gagani gagani tau ka diba niyadi. Mina resi, minari beika yokoi de nigifa, <sup>9</sup>adina gokai una moi dui reyadi bi iniye niyadi mironi. Ma gokai ofa sei rofuu kero rei feresi vegu amedo ma rama Sei rofuu naivo reyadi ka niyadi. <sup>10</sup>Ma ini Mida oma gutuna dego nari rededi ka niyadi — mina bi ini Mida Iesu, kaere bi muyenari moi dadiyo ma kaere Sei di gubuyo baido rofuu uni moi etagea rigo.

### Paul di moimai Thessalonica ri

**2** <sup>1</sup>Usika ourena, ya kaya diba una bae nesi ya oto reyafa bi tavoi tavoi de reyafa. <sup>2</sup>Ya ya diba, sena Philippi ri bi una rofuu no reyadi ma esika esika moyafa, idu uni Sei di ini aedena yaku yeiva una maro dada ini ago buni bi ya niyafa, una tourage regamadi utari.<sup>c</sup> <sup>3</sup>Uni usa usa ago ya vene rofuu resifa bi vegu no o mokena no dudu de ya eru regika ofa ofa dudu. <sup>4</sup>Idu Sei di ura ini ago buni uni vanari aigi reyo kana, mina nisifa; amiye di uka moi buni regika de resifa, idu Sei di uka moi ada regika resifa, kaere bi uni uka mokena diba nisi vedo. <sup>5</sup>Ya ya diba una bi ya moi ada reyagantedi di ago dudu de bae neyafa, o unike auna kana irisifa ni ofa regika ago nina de reyafa — Sei diba uni uka mokena bi! <sup>6</sup>Amiye yaku uni roka moi odoro reyagantedi de reyafa, ya vene rofuu o be vene yaku ka de, <sup>7</sup>idu Keriso di ni feidena vene kana una yaku uni vava dudu uni aedegi ya efare reyagadu. Idu ya vene fogori ave niyafa, kosini yaku ini mida mida susu masi dogo redo kana<sup>d</sup>. <sup>8</sup>Uni uka tora gade iniye ya marafa, mina resi ada dudu Sei di ago buni maka de ya marafa idu

<sup>b</sup> 1.6 Acts 17.5-9   <sup>c</sup> 2.2 Acts 16.19-24; 17.1-9   <sup>d</sup> 2.7 ya vene fogori ave niyafa, kosini... kana; bura bedakai ya sa amegamafa ri, una bi mida mida kana; una bi kosini kana nufa.

uni vegu ka. <sup>9</sup>Usika ourena, rama iniye mokefa, Sei di ago buni ya vene rofu ni rausi rega digasa urusa ariu moimai reyafa, moimai gira resi esika moyafa, ya vene rofu toe moi baina ga regika.

<sup>10</sup>Ya vene ma Sei iniye ka una vegamadi, uni vegu gokai bi akeke, rorobo ma vegu no de ya vene kaere uka vari gira maradi vene di fogori. <sup>11</sup>Adina ya ya diba una ya neinei gokai reyafa bi baba yaku ini mida redo kana, <sup>12</sup>Sei di ukari ina rofu yi vegu buni niyainedi ya egira regamafa, kaere bi ya raka nido ini ourefeidenana amena sana ma ini vabara ideri dui reyagane.

<sup>13</sup>Ma una ka toga Sei rofu buni tora gade masifa, adina Sei di ago buni moyadi, goina bi una rofu neideyadi ri; ya bi amiye di ini ago kana dudu de moyadi, idu Sei di ago kana, goina bi rama iniye. Adina Sei yaku mina ago dudu ka ini moimai yi veguri redo, ya kaere ina rofu uka vari gira aidedi. <sup>14</sup>Ma ya uni usika ourena kaere bi Iesu Keriso di, beika Sei di dubu ri Judea gaganiri amededi Jew vene gutuna ina vene rofu reyadi kana, yi gagani vene gutuna esika esika ka moyadi,<sup>e</sup> <sup>15</sup>kaere yaku Varika Amiye Iesu ma Sei di ago nidedi vene umuyeyadi ma una ka meki reyadi. Ina bi Sei moi ada de reyadi, idu amiye tau di tuma niyadi!<sup>f</sup> <sup>16</sup>Tutubena dava bouna vene rofu sina ni marafa moi vegu rigedi, idu uni mina ka biri rigi regamadi. Mina ida dudu ini vegu no mina besa besa tauri bodedi. Sei di ini gubuyo tora iniye bi kamini ina fafau deyo!

### Paul dubusa ina vene vegi moke moke reyo

<sup>17</sup>Idu, usika ourena, neituari ya rofu etagae riyafa ri — uni moke moke bi de, idu uni rovaita yaku maka — gokai de ya veyafa ma gokai dubusa ya vegika reyafa! <sup>18</sup>Adina uni ura bi dubusa ya rofu bae negifa. Na Paul, bi besa bae negika reida, idu Satani yaku una biri riyo. <sup>19</sup>Adina uni Varika Amiye Iesu di ini budari ini dairi dego ri, bi ya vene bi kaere bi uni uka mokena, una ada ma uni moimai rei mona reyafa di vegu. <sup>20</sup>Rama iniye, ya vene bi uni matuka ma ada!

**3** <sup>1</sup>Mina dada, una bi makai toga de amegasa nari regamafa ri, uni mokena buni moyafa bi unike maka Athens ri amegifa.<sup>g</sup> <sup>2</sup>Timothy bi ni feidesifa, kaere bi uni dubuini ma Keriso di ago buniri Sei di vakoi moimai resifa amiye, yi mokena vari gira aina moi gira ma ya egira reyainedi, <sup>3</sup>ye mina esika esika yaku ga ya moi no riyainedi. Ya ya diba mina deda vegu bi Sei di mokenari baigedi. <sup>4</sup>Adina, una ya sa amegamafa ri, sena ya toga toga nigamafa bi una rofu esika esika magedi. Ye niyafa kana bi vata niyo, bi ya diba. <sup>5</sup>Mina dada, toga de amegasa nari regida ri, Timothy ni feideyaka yi mokena vari gira aina bi

<sup>e</sup> 2.14 Acts 17.5    <sup>f</sup> 2.15 Acts 9.23, 29; 13.45, 50; 14.2, 5, 19; 17.5, 13; 18.12

<sup>g</sup> 3.1 Acts 17.15

gokai mina. Na bi ori reyaka be bi Satani yaku ya yi uka maina rego ri, uni moimai reyafa bi no nigo baebu!

<sup>6</sup>Idu Timothy bi ruika mamu una rofu bae okiyo ri, ago buni moi baiyo, yi gokai mokena vari gira aisi uka madedi. Ina niyo bi ya yaku mokena buni dudu una mokededi, ma yi ura una vegi rededi una ka gokai ya vegifa kana.<sup>h</sup> <sup>7</sup>Ye, usika ourena, uni toe ma esika esika tauri una egira reyadi ya fafau, adina yi mokena vari gira aina dada. <sup>8</sup>Ya vene bi Varika Amiye ideri are rei gira rededi vo nisi, ye rama una gua mamu veguri ameinu regifa. <sup>9</sup>Una bi gokai Sei buni tora gade magifa ya fafau; uni Sei di ini nemokori ya dada ada reyafa rofu buni tora gade masifa. <sup>10</sup>Urusa ariu una bi usa usa ni yeiva resifa, gokai dubusa ya vegifa rofu goinari yi mokena vari gira aina yau nido sana ya egira regika.

<sup>11</sup>Ma gua bi uni Baba Sei iniye ma Varika Amiye Iesu yaku uni ida ya vene rofu bae negifa ina vene bi riyagadu! <sup>12</sup>Varika Amiye ya kaya ya kaya ma amiye tau vakoi rofu uka madedi tora nisi rausi reyaine, una yaku ka ya rofu resifa kana. <sup>13</sup>Ye ina yaku yi uka ideri yeiva ya mago, ye ya bi vegu no yokoi de nufa ma akeke ameibigedi, uni Baba Sei di ini nemokori uni Varika Amiye Iesu ini akeke vene tau sa dego ri.

#### Sei ada reyaine vegu dudu ameibina

**4** <sup>1</sup>Usika ourena, una yaku gokai ameyaganedi bi ago ya marafa mina yaku Sei moi ada regedi, bi gua amededi mini. Ye metonari bi ya usa nisi ago ni egira resifa Varika Amiye Iesu ideri bi mina vegu bi besa besa rebiyaine. <sup>2</sup>Adina ya ya diba beika ago gira bi Varika Amiye Iesu di vava dudu ya marafa. <sup>3</sup>Ye mina bi Sei di ini ura dudu ya mina akeke niyaganedi: ya bi koa di vegu mina egavoi reyaganedi; <sup>4</sup>ya kaya ya kaya yi yuka vana nari reyaine, ida akeke ma rorobo dudu, <sup>5</sup>ma tutubena idana vene kaere bi Sei ina diba de, ina vene di koa mokena kana de. <sup>6</sup>Ma mina idari bi amiye yokoi vegu no ga reyaine o ofa ofa vegu ga boyaine, ini usika ourena fafau. Adina una makai sena ya rofu nisi ni diba reyafa mina kana vegu no bi Varika Amiye yaku toe mago. <sup>7</sup>Adina Sei yaku vegu no rena di una vo de niyo, idu vegu akeke dudu ameibina di vo niyo. <sup>8</sup>Mina resi, kaere amiye mina ago masifa mina fufuta mago, bi amiye rofu mina fufuta de mado, idu mina bi Sei rofu fufuta mado, kaere yaku ini Vima Kikifa ya mado.

<sup>9</sup>Ma gua usika ourena rofu uka mana bi ya rofu de bura regifa, adina mina bi Sei yaku ya kaya ya kaya uka maraganedi ya sena oteimaro. <sup>10</sup>Ma mina makai Macedonia gagani tauri usika ourena tau vakoi rofu rededi. Idu, usika ourena ya guyaguya nisifa, mina bi besa besa reyaganedi. <sup>11</sup>Ya sena niyafa kana yi mokena tora rifo kumo kimo ameibina vegu niyaine, yi moimai iniye maka resi yi vana

<sup>h</sup> 3.6 Acts 18.5

dudu maka moimai refo. <sup>12</sup>Mina resi yi ameibobigedi ri, ya dubu etofaro vene ya rofu kikifa regedi, ye amiye yokoi rofu de gauna moigika de regedi.

### Varika Amiye di ini dena

<sup>13</sup>Usika ourena, uni ura bi ya diba niyainedi kaere de neyadi vene rofu di resi bi ga uka esika refo, kaere be bi dadi rae rena di uka mokena aina de mina vene kana ga reyagane. <sup>14</sup>Adina una bi uka vari gira aisifa Iesu bi muyesi dubusa dadiyo, ye Sei yaku mina de neyadi vene kaere bi ini uka vari gira Iesu rofu aisi muyeyadi mina ina sa moi dego.

<sup>15</sup>Varika Amiye iniye di ini ago kana, mina ya nisifa una kaere vegu ameibogifa Iesu dairi dego ri, bi rama muyeyadi vene ouresi dadi rae regedi ma gabi una bi dadi rae regifa.<sup>i</sup> <sup>16</sup>Adina Varika Amiye bi oma gutuna imuna nigasa dego, naivo naivo vima tora di ini goroka dudu, ma Sei di ini kibi kukuroka rena dudu, ma Keriso rofu mokena vari gira aisi muyeyadi mina siko dadigedi. <sup>17</sup>Mina usi bi, una kaere vegu ameibobigifa una afei bogo ma ina vene sa seuya odorori Varika Amiye egogo baku regifa. Mina resi makai Varika Amiye sa toga amegifa. <sup>18</sup>Mina resi ya kaya ya kaya mina ago dudu egira rebifo.

### Varika Amiye dego mina toro refo

**5** <sup>1</sup>Ma, usika ourena, goina ari ma meda nemokori beika vata nigo bi ya vene rofu bura de regifa, <sup>2</sup>adina ya ya diba kotana Varika Amiye di ini dego meda bi duma duma amiye yaku urusa okido kana.<sup>j</sup> <sup>3</sup>Amiye yaku “Ari bi uka amuta ma buni vayavaya dudu” vo nibigedi ri, evade moi no rina meda okigo, rivo rema mida moigika esika guraudo kana; ma ori de digedi. <sup>4</sup>Idu, usika ourena ya bi mukunari de, ye mina meda yaku duma vene kana de ya etururu rego. <sup>5</sup>Adina ya tau vakoi bi vabara ma ariu di mida mida. Una bi mukuna ma urusa di rofu de. <sup>6</sup>Mina ye, una bi be vene yaku varededi kana ga rebinadi, idu ne are resi uni yuka vana nari rebinadi. <sup>7</sup>Adina kaere varededi bi urusa varededi, ma kaere koku no irisi forovai redevi bi urusa koku no irisi forovai redevi. <sup>8</sup>Idu una bi ariu vena di vene mina ye, uniye uni yuka vana nari regasa, ma mokena vari gira aina ma uka mana mina uni kokoba mari kana ainadi, ma Sei ya moi vegu rina di mokena ago bi ada bou kana ainadi.<sup>k</sup> <sup>9</sup>Vegu moi rina uni Varika Amiye Iesu Keriso dudu moigifa, adina Sei yaku ini gubuyo di esika esika moina di una vo de niyo. <sup>10</sup>Ina bi una dada muyeyo, mina resi muyena de o muyesifa vo nisi bi ina sa vakoi ameibigifa. <sup>11</sup>Mina dada ya kaya ya kaya egira regasa aedegedi, gua redevi kana.

### Metona ago

<sup>12</sup>Usika ourena, gua ya usa nisifa bi, yi fogori amiye kaere moimai rei gira resi Varika Amiye di rokari ya nari resi ya fafau oteimadedi, ya bi

<sup>i</sup> 4.15-17 1 Cor 15.51-52    <sup>j</sup> 5.2 Mt 24.43; Lk 12.39; 2 Pet 3.10    <sup>k</sup> 5.8 Is 59.17; Eph 6.13-17

ina rofu vei mama resi rei mona rebifa. <sup>13</sup>Ina vene bi ini moimai dada, uka manari bi rei mona mona resi kikifa rebifa. Ya kaya ya kaya uka amuta dudu ameibifa.

<sup>14</sup>Ma usika ourena, amei tavoi vareitavoi redevi vene ni egira refa, uka yau egira refa, mokena yau vene aedefa ma amiye sa gubuyo ga rebifa. <sup>15</sup>Vei mona rebifa, amiye yokoi yaku ya rofu no rebigo ri ya yaku ina ro dairi no ga re, idu vegu buni ya kaya rofu di ma amiye tau rofu toga rebifa.

<sup>16</sup>Ari neinei ada rebifa; <sup>17</sup>usa usa toga nigasa ameibifa; <sup>18</sup>beika baika tauri Sei rofu buni tora gade mabifa, adina mina bi Sei di ini ura ya rofu Iesu Keriso ideri.

<sup>19</sup>Vima Kikifa di ita ga ukafefa; <sup>20</sup>Sei di ago nido amiye di ago rofu ga mokei itu refa. <sup>21</sup>Beika baika tau mina vei mona resi buni maka moi gira refa; <sup>22</sup>deda vegu no rofu egavoi rebifa.

<sup>23</sup>Uka amuta di Sei iniye yaku ya moi akeke kotana riyaine, ma Varika Amiye Iesu Keriso dairi dego ri, ina yaku yi vima, uka mokena ma rovaita vegu no yokoi de nufa moi gira rei mona rego. <sup>24</sup>Sei ya raka nido amiye bi ini beika ago niyo mina moi gira risi rego, adina bi vegu rama redo amiye.

<sup>25</sup>Usika ourena, una fafau usa usa nifo.

<sup>26</sup>Usika ourena tau uni yuata mafo.

<sup>27</sup>Varika Amiye di vava gabireri, nai ago gira nida, mina bura rena bi usika ourena tau vakoi rofu bura vesi nifa.

<sup>28</sup>Uni Varika Amiye Iesu Keriso di buni tora gade bi ya vene sa ameibiyaine.